

# **BASES REGULADORAS DO PLAN ESPECIAL DE PARQUES INFANTÍS 2009**

## **1.- DENOMINACIÓN E APLICACIÓN ORZAMENTARIA**

O presente Plan especial de parques infantís 2009 é un plan anual da Deputación Provincial da Coruña para o exercicio 2009, que se financia cunha achega provincial na anualidade 2009 por importe de 900.000,00 euros e máis polas achegas municipais dos concellos que é preciso realizar para completar o financiamento dos investimentos.

A deputación vai consignar no presuposto provincial para o exercicio 2009 a cantidade de 900.000,00 € para o financiamento deste Plan, e polo tanto a súa aprobación definitiva non se poderá realizar ata a entrada en vigor do presuposto provincial desta anualidade, no que se inclúe crédito adecuado e dabondo para o seu financiamento, non xerando mentres tanto dereito ningún para os concellos solicitantes.

## **2.- FINALIDADE E OBXECTO**

A finalidade deste plan é a de cooperar cos concellos da provincia con poboación inferior ós 20.000 habitantes na realización dos investimentos necesarios para a mellora e reforma dos parques infantís municipais xa existentes, coa finalidade de adecualos ás esixencias do Decreto 245/2003, de 24 de abril, polo que se establecen as normas de seguridade nos parques infantís (DOG nº 89 de 9 de maio de 2003).

Por iso, o obxecto deste plan concrétese na realización de todas as actuacións precisas para adaptar os parques infantís municipais á citada norma, co obxectivo de que no seu conxunto cada un dos parques cumpra na súa totalidade a normativa vixente aplicable.

### **2.1.- Tipos de actuacións:**

Os concellos poderán solicitar calquera dos seguintes tipos de actuacións:

- Instalación de materiais brandos nas superficies sobre as que poidan caer os menores no uso dos elementos de xogo, que permitan a adecuada absorción de impactos e amortezan os golpes, para que se cumpra a norma UNE-EN 1177.
- Instalación, reparación ou substitución de elementos de separación das superficies de xogo, por medios naturais ou artificiais, para que queden debidamente acoutadas de forma segura e separadas do tráfico rodado.

- Adaptación dos parques para que sexan accesibles e poidan ser utilizados por menores discapacitados.
- Instalación, reparación ou substitución de vallas, papeleiras, asentos e outros elementos auxiliares para que cumpran coas normas específicas.
- Instalación, reparación ou substitución de fontes e xogos de auga que dispoñan sempre de auga potable.
- Instalación, reparación ou substitución de paneis informativos con indicacións sobre o teléfono público e centros sanitarios máis próximos, números de teléfono de urxencias e do servizo de mantemento do parque, prohibición de acceso de animais e de limitación do uso de bicicletas patines ou similares, recomendacións do uso dos xogos por tramos de idade, etc.

Nestes paneis informativos deberá figurar que a reforma do parque infantil foi financiada pola Deputación Provincial da Coruña, xunto co seu logotipo, sen prexuízo de que tamén figuren os datos do concello.

- Instalación, reparación ou substitución de elementos de xogo como bambáns, esvaradoiros, balancíns, carruseis, tirolinas, etc., para que cumpran a norma específica aplicable que para os novos xogos é a norma UNE-EN 1176 .
- Outras actuacións nos parques infantís existentes para a súa adaptación á normativa vixente.

## **2.2.- Requisitos das actuacións**

As actuacións cuxa execución se solicite polos concellos dentro deste Plan deberán cumprir os seguintes requisitos:

- Os parques infantís nos que se vaian a realizar as actuacións de mellora deberán ser de titularidade municipal e existir xa como parques infantís.

Non se poderá solicitar a realización de novos parques, pero si se poderá pedir o cambio de emprazamento dalgún parque xa existente cando sexa preciso por razóns de seguridade ou accesibilidade e así se xustifique na memoria que debe presentarse coa solicitude, sen que se poda solicitar o financiamento provincial para a adquisición do novo terreo.

- Cada concello poderá solicitar a realización de actuacións de mellora en uno ou varios parques infantís municipais, presentando un só proxecto para todos eles, que deberá redactarse conforme ao establecido no artigo 107 da Lei 30/2007, de 30 de outubro, do sector público.

- As obras deberán ser completas, no sentido de ser susceptibles de utilización ou aproveitamento separado e constituír unha unidade funcional, de acordo co establecido no artigo 74 da Lei 30/2007, de 30 de outubro, de contratos do sector público, e así se fará constar na memoria do proxecto.
- A denominación das obras incluídas en cada proxecto deberá identificar claramente as actuacións a realizar.
- A achega provincial destinarase exclusivamente ó financiamento da execución da obra definida no proxecto técnico correspondente.
- A achega da deputación para o financiamento de cada proxecto será dun 85% do presuposto, ata un máximo de 60.000,00 euros por concello, e a achega municipal mínima será do 15% do presuposto.
- O orzamento mínimo dos investimentos que poden solicitar os concellos para a súa inclusión no plan fíxase na cantidade de 50.000,00 euros para as obras e 18.000,00 euros para as subministracións.
- O concello deberá acreditar que para cada unha das actuacións conta coa dispoñibilidade dos terreos necesarios para a execución das obras e que conta coas autorizacións e concesións administrativas necesarias para a súa execución.

### 3. DESTINATARIOS

Poderán participar neste plan os 83 concellos da provincia da Coruña cunha poboación de menos de 20.000 habitantes, que son os seguintes:

Abegondo	Fene	O Pino
Aranga	Fisterra	A Pobra do Caramiñal
Ares	Frades	Ponteceso
Arzúa	Irixoa	Pontedeume
A Baña	Laxe	As Pontes
Bergondo	Laracha	Porto do Son
Betanzos	Lousame	Rianxo
Boimorto	Malpica	Rois
Boiro	Mañón	Sada
Boqueixón	Mazaricos	San Sadurniño
Brión	Melide	Santa Comba
Cabana de Bergantiños	Mesía	Santiso
Cabanas	Miño	Sobrado

Camariñas	Moeche	As Somozas
A Capela	Monfero	Teo
Carnota	Mugardos	Toques
Carral	Muxía	Tordoia
Cedeira	Muros	Touro
Cee	Neda	Trazo
Cerceda	Negreira	Valdoviño
Cerdido	Noia	Val do Dubra
Cesuras	Ordes	Vedra
Coirós	Oroso	Vilasantar
Corcubión	Ortigueira	Vilarmaior
Coristanco	Outes	Vimianzo
Curtis	Oza dos Ríos	Zas
Dodro	Paderne	Cariño
Dumbría	Padrón	

#### 4. FINANCIAMENTO

Para o financiamento deste plan para o exercicio 2009, a Deputación destina unha achega provincial total por importe de 900.000,00 euros. Non obstante, esta cifra poderá ser incrementada á vista das solicitudes presentadas, e tendo en conta as posibilidades presupostarias desta Deputación.

A aprobación definitiva do Plan non se poderá realizar ata a entrada en vigor do presuposto provincial da anualidade 2009, no que se inclúa crédito adecuado e dabondo para o seu financiamento, non xerando mentres tanto dereito ningún para os concellos solicitantes.

A achega da Deputación para o financiamento de cada proxecto será dun 85% do seu presuposto, ate un máximo de 60.000,00 euros por concello, e a achega municipal mínima será dun 15% do presuposto.

Non obstante, os concellos poderán voluntariamente incrementar o importe da súa achega cando sexa preciso para completar o presuposto total do proxecto técnico da obra que solicite.

Os concellos deberán desagregar para cada investimento a parte que financia a Deputación e a que financia o concello.

O orzamento mínimo dos investimentos que poden solicitar os concellos fíxase na cantidade de 50.000,00 euros para as obras e 18.000,00 euros para as subministracións.

## **5. FORMA E PRAZO DE SOLICITUDE**

Os concellos que desexen participar neste plan deberán presentar no Rexistro Xeral da Deputación, ou nas formas previstas no artigo 38 da Lei 30/1992 do 26 de novembro, de réxime xurídico das administracións públicas e do procedemento administrativo común, ate o día 31 DE ENERO DE 2009 inclusive, a seguinte documentación:

### **5.1.- Certificación do acordo plenario municipal.**

Certificación do acordo plenario municipal de participación no presente Plan, de conformidade co modelo que figura como anexo I, no que se acepten expresamente estas bases e se preste aprobación ao proxecto técnico das obras, coa indicación da súa denominación, orzamento e detalle do seu financiamento por axentes cofinanciadores, de xeito que se concrete o importe que se financia con cargo á achega provincial e o que se realiza con cargo á achega municipal, cumprindo as porcentaxes que se sinalan na base 4.

No mesmo acordo deberá adoptarse o compromiso de incluír no orzamento municipal crédito dabondo para o financiamento da achega municipal á obra e farase constar expresamente que o concello conta cos terreos necesarios para a súa execución e coas autorizacións ou concesións administrativas que sexan precisas.

Neste acordo incluírase a declaración do concello de que non solicitou nin percibiu ningunha subvención doutras administracións públicas para o financiamento da obra ou, no caso de que existan axudas ou subvencións concorrentes doutras administracións para a súa execución, deberá facilitar o detalle de cada unha delas e a acreditación de que a súa suma total non supera o 100% do seu importe.

Igualmente, neste acordo autorizarase á Deputación a obter as certificacións da Axencia Estatal da Administración Tributaria e da Tesourería da Seguridade Social nas que se acredite que o concello está ao corrente nas súas obrigas tributarias e coa Seguridade Social.

### **5.2.- Proxecto técnico**

Cada concello deberá presentar un só proxecto técnico no que se recollan actuacións de mellora en uno ou varios parques infantís municipais, que deberá redactarse conforme ao establecido no artigo 107 da Lei 30/2007, de 30 de outubro, do sector público. No caso de incluír obras en distintos parques, deberán incluírse presupostos parciais e planos para cada un deles.

Os planos serán a escala acoutada 1:100 como mínimo, e deberán reflectir, entre outros extremos, as vallas de protección, as zonas pavimentadas, as superficies de xogo e os aparatos de xogo. Todas as actuacións que se inclúan neste proxecto deberán cumprir e respectar a normativa específica aplicable.

Os proxectos técnicos deberanse presentar por duplicado exemplar.

### **5.3.- Informe técnico e fotografías**

Se deberá enviar informe técnico relativo as actuacións de mellora a realizar en cada un dos parques infantís municipais incluídos no proxecto, especificando expresamente para cada un deles as autorizacións administrativas que se precisan para a súa execución, a dispoñibilidade dos terreos necesarios e outros aspectos de interese que deban terse en conta.

O informe deberá acompañarse da reportaxe fotográfica do estado actual de cada un dos parques.

No caso de traslado dun parque a outro emprazamento mais idóneo, deberanse indicar as razóns de seguridade ou accesibilidade que así o aconsellan.

### **5.4.- Memoria xustificativa**

Deberase achegar unha memoria xustificativa onde se analice o estado se situación de cada un dos parques cuxa adaptación ou mellora se solicite, no que se xustifique a selección prioritaria destes parques respecto doutros do mesmo concello.

## **6.- APROBACIÓN DO PLAN.**

Á vista de todas as solicitudes presentadas, comprobarase que se axustan ao establecido nestas bases, especialmente no relativo ao seu obxecto, financiamento e documentación que se ha presentar.

No caso de observarse algunha carencia ou deficiencia nas solicitudes presentadas concederáselle ao concello un prazo de 10 días para a súa corrección, de conformidade co disposto no artigo 71 da Lei 30/1992, do 26 de novembro, de réxime xurídico das administracións públicas e do procedemento administrativo común.

Necesariamente, deberá xuntarse coa solicitude no prazo de presentación establecido no primeiro parágrafo da base 5 do plan, o proxecto técnico da obra que se indica na base 5.2, non sendo unha deficiencia subsanable a omisión deste documento.

Para o caso de que o importe total das solicitudes presentadas ó amparo desta convocatoria sexa superior ás dispoñibilidades presupostarias, serán de aplicación os criterios de prioridade que se indican e pola seguinte orde :

<b>CRITERIOS DE PRIORIDADE</b>
1º.- Será prioritarios os proxectos que inclúan o cambio de emprazamento dalgún parque xa existente cando sexa preciso por razóns de seguridade ou accesibilidade e se considere debidamente xustificado.
2º.- Serán prioritarios os parques que están en situación de maior deterioro e perigosidade apreciados en base á documentación achegada polos concellos e as posibles visitas e inspeccións que se podan realizar.
3º.- Terán prioridade os concellos de menos poboación da provincia.

O pleno da deputación prestaralle aprobación ao plan, unha vez que teña entrado en vigor o presuposto provincial 2009, e nel se incluírán os investimentos solicitados polos concellos que estean correctos e completos, tendo en conta os criterios de preferencia sinalados. No Plan se detallará a relación das obras que se van realizar nos concellos da provincia que se incluan, con indicación do seu financiamento entre a deputación e o concello.

As solicitudes para as que non exista crédito que posibilite a súa inclusión dentro do Plan Base poderán incluírse nun Plan Complementario que se financiaría, no seu caso, con cargo ós remanentes que se poidan producir por anulacións de obras ou baixas de licitación que minoren a achega da deputación nas obras de calquera concello ou coas maiores achegas que poida facer a deputación.

No mesmo acordo aprobarase que a contratación e execución dos investimentos se realizará polos respectivos concellos.

Unha vez aprobado o plan, someterase a exposición pública mediante a publicación dun anuncio no Boletín Oficial da Provincia para que durante un prazo de 10 días se poidan presentar as alegacións que se estimen oportunas, e será remitido para coñecemento e informe á Xunta de Galicia e á Comisión Galega de Cooperación Local, de acordo co artigo 112 e concordantes da Lei 5/1997, de 22 de xullo, da Administración Local de Galicia. Unha vez transcorridos os 10 días de exposición pública e dende a solicitude de informe sen que se presentaren alegacións nin se emita informe ningún, poderanse proseguir os trámites.

## **7.- CONTRATACIÓN DAS OBRAS**

A contratación das obras farase polos respectivos concellos por delegación da deputación, e deberá realizarse ata o día 1 DE DECEMBRO DE 2009. Non obstante, este

prazo poderase ampliar mediante Resolución da Presidencia, previa solicitude motivada do concello.

A contratación realizarase de acordo coa Lei 30/2007, de 30 de outubro, de contratos do sector público, utilizando os pregos-tipo de cláusulas administrativas particulares aprobadas expresamente por esta Deputación.

As baixas que se produzan no plan aplicaranse a minorar a achega municipal que se realice ata anular, se fora posible, a dita achega. O resto da baixa destinarase a minorar a achega provincial na correspondente obra, podéndose utilizar para financiar as obras que figuran no Plan Complementario, segundo se detalla na base 6.

Unha vez adxudicadas as obras deberá remitirse á esta Deputación a seguinte documentación:

- Documento administrativo no que se formalicen os correspondentes contratos.
- Listado de obras con datos de adxudicación debidamente cubertos no modelo anexo II.
- A documentación que se indicará na circular de contratación, xustificativa da adxudicación realizada.

## **8. EXECUCIÓN DO PLAN**

As obras executaranse polos respectivos concellos con arranxo ao proxecto técnico da obra presentado coa solicitude e aprobado co plan. A dirección e execución das obras realizaraas o concello correspondente, sen prexuízo da posibilidade de que a Deputación realice as inspeccións que considere convenientes.

O prazo para que os investimentos incluídos neste plan estean rematados e xustificados será ate o día 1 DE DECEMBRO DE 2010. Non obstante, o concello poderá xustificadamente solicitar unha prórroga para o seu remate.

As modificacións dos contratos tramitaranse, no seu caso, polo concello, de acordo co establecido na citada Lei 30/2007 de contratos do sector público. En todo caso, requirirase a redacción dun proxecto reformado que será aprobado polo concello e posteriormente pola Deputación.

Así mesmo o concello deberá financiar todos os gastos a maiores que poidan xurdir durante a execución das obras, como os incrementos por modificacións de proxectos, certificacións finais das obras ou os relativos á dirección da obra, coordinación de seguridade e saúde, control de calidade, etc.

Dende a iniciación das obras ata a súa recepción deberá colocarse un cartel conforme ao modelo facilitado pola Deputación cos datos da obra, o que se acreditará mediante o envío de dúas fotografías, unha do propio cartel e outra do cartel da obra no seu contorno, sendo requisito indispensable para que esta deputación transfira ao concello o importe da achega provincial ao plan.

## **9. PAGO DA ACHEGA PROVINCIAL**

A xustificación da realización dos investimentos efectuarase polos respectivos concellos presentando a certificación de execución das obras.

O libramento ao concello do importe da achega provincial realizarase á vista das certificacións das obras remitidas polo concello, que haberán de presentar no modelo oficial existente na deputación, e que figura na súa páxina web, ou facturas no caso de subministracións, debidamente aprobadas polo órgano competente do concello e por triplicado exemplar. Procurarase que as certificacións sexan dun importe non inferior a 6.000,00 euros, salvo na última certificación.

A deputación transferirá ao concello o importe correspondente á achega provincial polos investimentos realizados, previa verificación da adecuación das certificacións ao proxecto aprobado no Plan, ou aos proxectos modificados que fosen formalmente aprobados.

Coa primeira certificación deberán xuntarse as dúas fotografías onde se reflicta o propio cartel, conforme ao modelo establecido, e a súa colocación na obra.

Así mesmo, terá que acompañarse a certificación expresa do concello de que non solicitou nin percibiu ningunha subvención doutras administracións públicas para o financiamento da obra ou, no caso de que existan axudas ou subvencións concorrentes doutras administracións para a execución da obra, o detalle de cada unha delas e a acreditación de que a súa suma total non supera o 100% do seu importe

Ao remate da obra, coa última certificación de execución, deberase achegar a correspondente acta de recepción. Ademais, se deberá achegar unha reportaxe fotográfica das actuacións realizadas no parque, para poder comparar o seu estado final e inicial. Nesta reportaxe incluírase necesariamente unha fotografía do panel informativo no que figure que a adaptación do parque foi financiada pola deputación xunto co seu logotipo, segundo se esixe na base 2.

O concello deberá comunicarlle á Deputación a data na que estea prevista a celebración da recepción da obra, posto que esta Deputación ten previsto acudir a algúns dos anteditos actos de recepción para verificar a súa correcta execución.

Con carácter previo ao pagamento da achega provincial, deberá acreditarse que o concello está ao corrente das súas obrigas tributarias e coa Seguridade Social. En todo caso,

se o concello tivese débedas vencidas, líquidas e esixibles por ingresos de dereito público provincial, autorízaselle á deputación para que o pagamento da súa achega sexa por compensación.

## **10.-INTERPRETACIÓN**

A interpretación e resolución das dúbidas que puidesen xurdir serán resoltas polo Presidente da Deputación, logo do informe da Secretaría e da Intervención. Para o non disposto expresamente nas presentes Bases aplicarase supletoriamente o establecido na Lei 38/2003, do 17 de novembro, xeral de subvencións.

**ANEXO I**

**MODELO DE ACORDO PLENARIO**

Don/Dona ..... secretario/a do  
Concello.....

**CERTIFICA**

Que o Pleno do concello en sesión realizada o día ..... adoptou, entre outros, o seguinte acordo:

1º) Participar no Plan especial de parques infantís 2009, cuxas bases se coñecen e aceptan na súa totalidade, polo que solicita a realización do investimento que se indica de seguido:

<b>DENOMINACIÓN</b>	<b>ORZAMENTO TOTAL</b>	<b>ACHEGA MUNICIPAL</b>	<b>ACHEGA PROVINCIAL</b>

2º) Aprobar o correspondente proxecto técnico da obra previsto no apartado 1º.

3º) Para o financiamento do importe da achega municipal con cargo aos seus propios recursos, este concello comprométese a incluír no orzamento municipal correspondente, crédito dabondo para o seu financiamento.

4º) Declarar que o concello conta cos terreos, autorizacións e concesións necesarios para a execución da obras.

5º) Declarar que o concello non solicitou nin percibiu ningunha subvención doutras administracións públicas para o financiamento do investimento ou, no caso de que existan axudas ou subvencións concorrentes doutras administracións para a súa execución, achégase o detalle de cada unha delas, acreditándose que a suma total non supere o 100% do seu importe.

6º) Autorízase á Deputación a obter as certificacións da Axencia Estatal da Administración Tributaria e da Tesourería da Seguridade Social, nas que se acredite que o concello está ao corrente nas súas obrigacións tributarias e coa seguridade social.

7º) Facultar ó alcalde para executar todo o relacionado co presente acordo.

E para que así conste, expido a presente certificación, de orde e co visto e praxe do Sr. alcalde, en  
....., o día ..... de ..... do ano dous mil .....

V.pr.  
O alcalde;